

ENKETO PRI LA ESPERANTO-LITERATURO EN PUBLIKAJ BIBLIOTEKOJ.

La celo de ĉi tiu enketo estas:

1. ekscii en kiu grado la Esperanto-literaturo jam troviĝas en publikaj bibliotekoj.
2. ekscii kion ni plej bone faru en la estonto sur tiu ĉi tereno.

Nia scio pri la hodiaŭa disvastiĝo montriĝas tre grava, ĉar estas karakteriza noto de la Esperanto-literaturo, ke ĝi plejgrandparte ĝis nun estas eldonita en malgrandaj kvantoj kaj krome disvastiĝis tra la tuta mondo. La rezulto estas, ke multaj eldonoj ne plu aŭ tre malfacile estas troveblaj.

Krome la literaturo troviĝas ĝenerale nur ĉe privatuloj, kies posedaĵo ne estas konata kaj kiuj ne tiel facile povas disponigi la verkojn al petantoj.

Ju pli Esperanto evoluas kaj estas aplikata, des pli grandiĝas la valoro de la antaŭaj eldonoj, speciale por sciencaj, lingvistikaj kaj historiaj serĉadoj.

Tial ni proponas enketon pri la disvastiĝo de la Esperanto-literaturo en la publikaj bibliotekoj kaj tiel ni provas ekscii kaj konatigi kie oni povas konsulti, pruntepreni aŭ fotokopiigi tiujn eldonojn.

Alia efiko povas esti, ke ni retrovas valorajn verkojn, kiuj eble povas reeldoniĝi. Tiu ĉi konstato tre gravas, ĉar la milito jam pereigis multon, kaj nur per taŭga distribuo de Esperanto-verkoj aŭ de ĝiaj fotokopioj ni povas savi, kio restis.

La agado en la estonto ne nur valoras por la uzado de la jam aperintaj verkoj, sed ĝi povas ankaŭ esti stimulo por la taŭga distribuado de la plej gravaj libroj kaj revuoj al la publikaj bibliotekoj.

Demandaro pri la hodiaŭa situacio.

1. Kiuj publikaj bibliotekoj (lokaj, regionaj, institutaj) posedas fakon de Esperanto-literaturo? Bonvolu indiki la nomon, adreson kaj karakteron de la bibliotekoj.
2. Kiu estas proksimume la nombro de la Esperanto-libroj en ĉiu?
3. Kiu estas proksimume la nombro de la Esperanto-revuoj en ĉiu?
Se eble:
4. Kiuj abonoj je revuoj estas daŭrigataj?
5. Kiuj gravaj revukolektoj tie troviĝas?
6. Kiuj maloftaj libroj tie troviĝas?
7. Kiuj maloftaj revuoj tie troviĝas?
8. Ĉu ekzistas presita katalogo de la libraro?

Rimarkoj:

1. Ni limiĝas tiun ĉi enketon al Esperanto-libroj kaj -revuoj; ne temas pri dokumentoj, fotoj, muziko, ktp.

2. La enketo nur koncernas Esperanton, ne aliajn internaciajn lingvojn kaj internacilingvajn projektojn.

Demandaro pri estonta agado.

Dum la enketo nur koncernas la hodiaŭan staton, ni donas kelkajn sugestojn ankaŭ en demando-formo:

1. Ĉu jam ekzistas en via loko (regiono, instituto), persono aŭ grupo de personoj, kiuj pristudas la distribuon de Esperanto-literaturo en bibliotekoj?
2. Se ne, ĉu iu(j) povas interesiĝi pri tio, se montriĝas utile agadi por tiu ĉi celo?
3. Ĉu la direkcio mem de la biblioteko deziras aĉeti librojn kaj revuojn en Esperanto?
4. Ĉu privataj personoj aŭ grupoj deziras provizi tiun bibliotekon per Esperanto-eldonoj? Ekz. per aĉeto, abono, aŭ per donacado post legado.
5. Ĉu eble la propono taŭgas, ke parte la Esperantistoj prizorgos tiun provizon kondiĉe ke la bibliotekestraro aĉetos alian parton?
6. Kiuj libroj kaj revuoj estas la plej taŭgaj por tiu biblioteko?

Rimarkoj:

1. Ĉu vi deziras publikigadon pri la rezulto de tiu ĉi enketo?
2. Ĉu vi eble aplikis alian metodon, kiu montriĝis efika?

Prof. H. G. Wannemakers, S.J.

Kiu samideano disponanta sufiĉe da tempo estas preta servi kiel centro al kiu oni povos sendi la materialon, kaj kiu povos fari la ceteran laboron. Oni ne hezitu anonci sin. — La Redaktoro.

616 - 036.86(437)

AL INVALIDULOJ.

En Ĉeĥoslovakujo ek de 1951 ekzistas nur unusola organizaĵo de invaliduloj, la Asocio de Invaliduloj Ĉeĥoslovakaj. Oni deziras kunlaboron kun invaliduloj en la tuta mondo, interŝanĝadon de spertoj, informoj pri la solvo de invalidulaj problemoj en aliaj landoj, k.t.p. Skribu esperantlingve al s-ano Jos. Ambroz, Brno-Zidenice, Špačkova 3, aŭ (ankaŭ nacilingve) al Generální Sekretariát Svazu ĉsl. Invalidů, Praha X, Cyrilometodějské nám. 12, Ĉ.S.R.

Petas korespondon, prefere kun kuracisto-specialisto pri nazo, gorĝo kaj orelo en Skandinavio aŭ Anglujo, Indonezia Kuracisto Sampurno, Belinju-Banka, Indonezio.